





滄溟先生集卷之十

濟南李攀龍于鱗撰

七言律詩

答寄聶儀部子安

司馬雄才動帝京當時群從獨高名  
奏成華省青雲氣賦就仙郎白雪聲  
春色迥分南北望江流不盡古今情  
應憐此意同巖穴千里傳書歷下生

薛子熙以青州使君聘脩郡誌見枉林園尋  
示贈章作此答寄

越客風流問字年登臺把酒白雲天一毛  
實自河東



下雙鯉兼從海上傳彩筆乍含星野動明珠長對雪  
宮懸已看霸氣前朝盡猶說當時鮑叔賢

病間答許殿卿

病客高齋黯澹生何來一札大梁城夢回滄海風雲  
色春落黃河雨雪聲伏枕自須疑慢世曳裾兼亦似  
逃名可知枚馬元同調誰見千秋出處情

南海歐生自京師遺書于大梁屬許右史為

致答此

中原才子動相聞誰復高名得似君南海一珠懸北  
斗黃河雙鯉墮青雲城邊五色羊何在臺上千金馬

不群獻賦幾年猶未遇羅浮春思坐氤氳

送魏按察之路

壺關上黨切雲霄憲府中天插漢標山勢西臨三晉  
險地形東控兩河遙名從出守高郎署策本和戎寵  
聖朝盡道疆場懸節鉞猶能書札滿漁樵

送崔明府之宿遷

山陽列郡接青徐宿子中開百里居自是燕臺求駿  
馬飄然淮海駕蜚魚邑因美政花相似令有文名錦  
不如共理即今明主意憐君指日捧徵書

題李水部恩榮卷



自奉天書出建章 明時誰不羨仙郎  
五雲偏借斑衣色 列宿遙含畫省光  
水部盛名懸楚望 南山佳氣入高堂  
鹿門咫尺龐公宅 那見恩波繞漢陽

送賈明府以徵書入遷

茂宰能名海岱聞 更推經術起河汾  
卽論展驥無千里 果爾飛鳧便五雲  
烏府風霜秋正急 黃門供奉日爲群  
徵書十道求高第 治行誰人不讓君

送郭子坤別駕之廬州

諸生垂白困談經 何似雄飛出漢庭  
客自燕臺知驥足 人從金斗識彗星  
耆闍海外來峰色 大蜀淮西擁

地形 匣裏佩刀誰所贈 龍鳴風雨未堪聽

其二

吳楚西南郡 閣重廬江小吏日從容  
濡須不是天河水 霍嶽爭齊紫蓋峰  
京洛仙舟飛似鷁 并州竹馬健如龍  
已知家世多名士 難道明時可易逢

許殿卿擢左史

萬里檐帷逗主恩 長裾一再歷寒溫  
諸侯賓客梁園盛 帝子官僚相國尊  
誰爲從旁驂駟馬 自應虛左避夷門  
况兼詞賦凌雲氣 漢署風流可更論

九日登樓



白鴈黃花處處秋  
鮑山風雨獨登樓  
忽驚返照湖中出  
轉見孤城水上浮  
多病恰堪成卧隱  
濁醪真足抵窮愁  
先生懶作東籬會  
可但交情老自休

青州志成薛生重枉報別將詣元美作此爲贈

於越諸生纓下來  
梧宮重起讀書臺  
薛君世業推經學  
齊客家傳讓史才  
北海風流天上座  
雲門秋色鏡中開  
菰蘆史有人相問  
爲道登龍御李廻

青州志成贈杜使君

使君經術有餘師  
元凱家傳左氏辭  
東海大風

翰少陽寒色動  
褰帷按圖冠帶還  
千里問俗春秋自  
一時况是郡城常  
下鳳文章兼似羽毛奇

題南海栢臺甘露贈潘侍御二首

繡斧光清瘴海雲  
行臺甘露栢紛紛  
九天驄馬人爭避  
五色神羊氣不群  
白簡風生偏起粟  
皂囊秋淨總垂文  
侍臣豈讓東方朔  
千載芙蓉奉聖君

其二

蘭臺使者憶長安  
萬里雲霄攬轡看  
忽報三危開玉樹  
誰分雙掌注銅盤  
霜凝合浦明珠出  
風動增城瀑布寒  
清節滿朝君不信  
流光偏綴惠文冠



題潘廷尉留餘堂

前朝知政四留餘，廷尉爲堂取自書。  
潘令官銜猶散騎，于公門第早容車。  
法星傍斗懸高座，佳氣如雲護直廬。  
海內稱平逢此日，主恩先已未應虛。

子與自蘆臺量移瑞州二首

題坐高名漢署來，魚鹽小吏混蘆臺。  
誰憐汝海分符客，自是南皮作賦才。  
老驥霜蹄千里動，佩刀寒色九河開。  
量移休道非知遇，難得君恩一日回。

其二

遙傳雨露一時新，不負滄零戀主身。  
高卧中原堪

有客雄飛爾輩可無人，屏星色動雙龍曙。  
錦水光分五馬春，詩興宦情看並美。  
南州孺子况爲隣。

得元美馮參政書知王沂州先已失寄

搖落中原伏枕時，故人千里一相思。  
雙魚不減加餐字，五馬虛傳遣吏辭。  
我在河山終未邈，書來雨雪自堪遲。  
從今把酒登樓處，數子江湖會有期。

答寄敬美

君家鴻鴈滿江干，歲杪逢人一字難。  
白雪似應工伏枕，青山好在重加餐。  
卷中雙玉清相倚，掌上千金笑獨看。  
兩地起居俱不惡，風塵回首任漫漫。



寄題元美藏經閣

岩堯飛閣太湖傍有客繡經日蒲牀白馬尚留霜練  
影彩毫應帶雨花香當年張掾生秋興何處支公坐  
道場君自風流兼二子吳門極目正茫茫

送歐文學之江都

雨雪寒燈對濁醪蕭然似是一儒曹下帷國士堪華  
髮草檄門生自彩毫雙峽迥分滄海氣孤城秋壯廣  
陵濤文星雖小人爭識南斗常臨劍影高

寄張幼于

吳門風雨洞庭陰上客常開墨林劍閣自題名更

起鱸魚一憶興何深古今不改中原色南北相看萬  
里心愧我驚人無俊句勞君爲入三龍吟

白雪樓寄懷徐使君兼呈元美

木落清河入檻流平陵月出照牀頭開樽自動青雲  
色掩卷俱含白雪愁南國佳人能命駕中原病客此  
登樓從他不淺山陰興遠道無因報子猷

秋日寄懷元美兼呈吳徐二使君

十載江湖白露寒因君萬里憶長安故人相向中原  
老秋色何如畫省看邵武功名非不佞汝陽經術雅  
能官即今垂作漂零客可道音書日轉難



寄題況吉甫藥湖別業在荷山下

湖上高齋萬木齊，白雲長在楚天西。  
落霞一散燒丹火，秋水遙通濯錦溪。  
伏枕自來詩不廢，扁舟誰爲酒同攜。  
南峰盡作蓮花色，曾是王喬隱遁棲。

答寄余德甫

二月鴻書發豫章，到來春興日能長。  
宦情轉借中山篋，詩句猶含右省香。  
海內故人元落落，江南秋色正蒼蒼。  
遙知相憶登高處，更過陶家醉不妨。

寄謝俞仲蔚寫華山圖

雲臺隱者一茅龍，曾道神仙自可逢。  
忽爾畫圖開萬

里，居然秋色在三峰。  
貪看塞外黃河下，坐失關門紫氣重。  
况復題詩如謝眺，當年却恨不相從。

奉贈杜使君寄上太翁八十壽

越徼春生戲綵天，風流耆舊楚先賢。  
青州五馬分符日，渭水非熊入夢年。  
一自趨庭經術就，還應託乘帝恩懸。  
卽今南極長朝斗，並照明珠北海邊。

秋夜白雪樓贈周公瑕

日落風清竹樹林，一樽飛閣敞秋陰。  
纔逢狗監人先老，能到龍門客自深。  
海上共懸明月夢，山中堪贈白雲心。  
陽春寡和休言誤，此夕因君作楚吟。



登華不注山送公瑕

鴻鴈高飛木葉丹  
逍遙臺上一憑闌  
浮雲不動孤峯起  
落日長臨二水寒  
多病故人書未達  
中原秋色醉相看  
預愁匹練江南道  
極目吳門駐馬難

題周天球小象

落魄吳門五十春  
嬾從高閣畫麒麟  
此中墨客爭知妙  
何處詞人更有真  
白眼自宜置丘壑  
紅顏元不染風塵  
東墻休掛喬家女  
夜恐周郎作後身

贈吳人梁辰魚

迢遙岱嶽海漫漫  
秋興如君未易闌  
三觀雲霞天上

坐蓬萊宮闕掌中看  
纔探綠綺陽春動  
一說干將紫氣寒  
詞客吳門誰不羨  
王家兄弟雅盤桓

寄謝許左史刊倡和集

平臺左史寄相思  
開卷風流見往時  
已自游梁詞賦長  
翻因御李姓名疑  
玄經竟爲何人出  
郢調除非和客知  
君有明珠堪照乘  
更煩清影及茅茨

舜祠哭臨大雪

雨雪號天慘曙暉  
君王千載一垂衣  
廷中左鉞將軍出  
海上樓船使者歸  
紫氣不隨江漢轉  
白雲還傍薊門飛  
孤臣賸有蒼梧淚  
逐客瀟湘在亦稀



答寄子與時自蘆臺移瑞州按察山東

北風飛雪擁南奔苦向縑袍掩淚痕  
病客世疑中散傲故人官起外臺尊  
尺書萬里存交誼一歲三遷見主恩  
月出登樓如匹練每依吳觀望吳門

於白雪樓送襲生入貢

樓上春陰動曉寒  
薊門千里入馮闌  
別來白雪還誰和  
老去青雲好自看  
天子今逢新禹貢  
諸生不改舊周官  
臨軒若問羊裘客  
莫道江湖有釣竿

杜青州按察楚中

東方千騎古諸侯  
憲府新開大楚秋  
北海清風猶滿

座武昌明月更登樓  
五雲過郢朝佳氣  
三峽吞江擁上游  
此地功名誰得似  
君家元凱自荊州

寄別元美

誰憐伏闕上書還  
國士銜冤動帝顏  
殺氣始應高碣石  
飛霜猶自滿燕山  
風塵雙淚縑袍盡  
湖海扁舟白髮閒  
却念十年携手地  
不知春色在吳關

答元美山東道中見寄

飛來尺素九河陰  
報道春光滿上林  
游子自矜年少好  
故人無恙歲寒心  
即今病借青雲起  
何用詩傳白雪音  
處士一星依帝座  
兩朝誰似主恩深



答元美廣川道中見寄

檄書遙借劔門看，只尺平原一笑難。  
便道何妨留作客，他家惟願起爲官。  
雙龍夜敞星文動，匹馬秋深嶽影寒。  
杯酒可知公子意，空懸十日布衣歡。

答王敬美廣川道中見懷

薊門秋色夢中偏，二子乘舟下廣川。  
食客未應常在趙，酒人誰復並遊燕。  
心知老驥元千里，目送歸鴻自一天。  
巴分逢蒿能興盡，壚頭春酒却堪憐。

答竒俞仲蔚兼呈元美時不果枉因有末句

濁酒新開綠綺鳴，白雲湖上掩柴荆。  
與來陶令還辭

社老去龐公不入城，一疏中原高病色。  
千秋吾黨見詩名，故人徑作書相別。  
握手看君負此生。

寄懷子與

白雲愁色滿秋天，海上離心鴈影傳。  
那堪對酒書相憶，况復登樓月正圓。  
自爾一攜龍劍合，何人更問鸚冠。  
篇莫言十日平原飲，不是王孫得意年。

殷洗馬誕子值今上登極日

詞臣三命侍經筵，聖主龍飛薊北天。  
珠借星辰堪並出，弧隨日月更新懸。  
一毛深照銜圖夜，千里長懷托乘年。  
共訝玉堂分氣色，兼城重喜得藍田。



寄賀大官殷少宰

十載詞林供奉中，史才經術並稱雄。  
恭承三命銅龍署，兼典諸儒白虎通。  
要地持衡當北斗，清聲曳履入南宮。  
猶言紫極氤氳處，非復文昌八座同。

答寄劉子威侍御

二首

吳客檄書問轉蓬，姑蘇臺上起秋風。  
七星已佩千將劔，五色還乘鮑氏驄。  
江海雙懸精自合，陽春一曲步逾工。  
只今曾照西施月，多少娥眉畫不同。

其二

憶昔風雲滿帝鄉，同時射策向明光。  
一毛宛在中書

日匹練遙飛御史霜，北海清尊開岱色。  
西京綵筆照河梁，非君尺素三江下，爭得秋聲入鴈行。

顧中翰祭告德衡二藩兼有事沂山東海

聖主新恩北極開，侍臣銜命出燕臺。  
三齊茅土星潢近，二國松楸雨露回。  
百丈自天垂瀑布，五雲佳氣接蓬萊。  
俱言海嶽遊偏壯，爲有王褒作頌才。

送郭使君解郡暫還豫章詩有序

公之難去郡，百姓郡百姓之難去公，猶之  
免赤子於懷也。斯古遺愛焉，不獲乎上民  
不得而治矣，不曰直道而事人焉，往而不



三黜哉惟是

帝命維新舜有天下選臯陶於衆危言危行是以論其世也重選而厚望之相與以成其後者乎

春風解郡豫章還已報徵車起漢關儘怪雙龍高紫氣何妨五馬照朱顏門人榻自南州下座客樽應北海閑似是 朝廷知借寇先開書篋慰中山

送都轉運劉使君還萬安有序 二首

使君之在西省與僕甚驩久不聞問轉運山東時某杜門十載矣哀宗梁之悠悠感

王徐之常勤抵掌於同舍之役也使君司寇世家仲氏入拜九卿季子出二大郡是稱難兄再領國課厥聲卓然尋以舊守常德誤中掇拾當路惜焉顧使君之在西省不少假一豕宰掾卽風采可知矣

使君漕輓三東回 天子全齊外府開海王至今餘伯氣大風千古見雄才魚梁忽落雙江水白石遙分萬里臺更廣絕交成妙論可無人識孝標來

其二

十年西署結交驩別後雲霄尺素難郡接荆衡分岳



牧場開海岱領鹽官五溪誤見明珠拾千里誰將老  
驥看莫道賜環非近事新懸白日照長安

答元美吳門邂逅于鱗有贈

四首

始蘇城上倚高臺却望中原酒一杯彼自有人浮海  
去我今爲客渡江來飛龍忽報干將合老驥還驚匹  
練開共向風雲論二子誰知天地此徘徊

其二

徵君巖穴雅能深出處人間總陸沉流水乍含鍾子  
調浮雲不繫邠生心關門紫氣長來往海上青山更  
古今世事彈冠難自料風塵容易是抽簪

其三

萬里風雲北極生中原二子舊齊名居然霄漢雙封  
事自是江湖一宦情天借客星高物色歌回春雪壯  
潮聲何妨邂逅成佳會正復相思命駕行

其四

雪滿江城醉色寒蕭條春興入彈冠自憐滄海雙珠  
合誰作青雲一鶚看日月祇銷高伏枕風塵何事老  
投竿豈宜梅福吳門在共說先朝吏隱難

過嚴陵

嚴陵物色動新年解纜春回七里船繡領更宜殘雪



映釣臺高並客星懸灘聲乍合三江壯山勢遙臨百  
越偏此日青陽瞻帝座羊裘深愧昔人賢

題候濤山觀音寺寺徒自落迦

落迦山上古祇林白馬西來峽口深月出爾時樓閣  
影風還如是海潮音若非鸚鵡元能語誰解蓮花不  
染心五十三員知識盡可勞踪跡問浮沈

大閱兵海上

四首

使者乘輶大閱兵千艘並集甬句城騰裝殺氣三江  
合吹角長風萬里生岷岷擁樓臺天上坐陣回魚鳥鏡  
中行不知誰校昆池岷岷橫海空傳漢將名

其二

戈船諸校錦征袍水戰當場命客豪萬櫓軍聲開島  
嶼千檣陣影壓波濤土小城深泛旌旗動射的遙銜竹  
箭高東海便應銅柱起何妨馬援是吾曹

其三

列艦如城積水前援枹擁棹出行邊桔槔氣迸流烏  
火組練光搖太白天鵝鶴一呼風雨集鼉鼉雙駕斗  
牛懸即今萬國梯航日並識君恩浩蕩年

其四

新開帷幄控朝宗萬里波臣老折衝海氣抱吳遙似



馬陣雲含越總如龍中流鼓應潮聲疊下瀨戈迴日  
影重自有長纓堪報主誰言白雉竟難逢

元美起家按察河南寄促之官

莫道漁樵計已安主恩堪爲一彈冠足知上國群  
公疏猶作中原二子看虎觀迥連嵩少起龍門高倚  
大江寒與君聊玩人間世明日抽簪未是難

答贈王給事

漢帝風流盛栢梁一時才子羨爲郎歸來東海桃三  
熟諫罷金門草數行謫籍祇今人欲盡除書何意客  
相忘黃公雖道商巖起家本鄞山是故鄉

二山人孤山吟社得菲字

西陵樹色澆斜暉一片仙舟拂練飛三竺漸從天上  
落二峯高入雨中微人今湖海開詩社客自雲霄奉  
禁闈綵筆如花誰不羨敢將春興鬪芳菲

靈隱寺同吳馬二公作

武林臺殿敞諸天建自咸和第幾年纔到上方雙澗  
合飛來何處一峰懸梵音動雜江潮轉燈影長含海  
日傳所以龍宮稱絕勝驪珠交映使君前

和馬侍御賦得飛來雙白鶴

三花珠樹五雲開海上雙飛白鶴來借問分行棲玉



署何如對舞映霜臺月明華表聯翩起雪滿緱山並  
駕回萬里只今誰比翼仙禽原自不群才

和馬文見送巡海之作

樓船遙指越王城萬里波濤按部行門下有人惟說  
劍江南何處不談兵長纓我媿山東妙銅柱君懸海  
外名忽訝天台霞色起開槭彩筆更縱橫

煙霞嶺

煙霞不隔洞天遙佛影千巖散寂寥絕壁倒銜滄海  
照一峯高映赤城標白雲家在時堪駐紫氣山深夜  
自朝莫被藤蘿迷出入相逢終日少漁樵

董生寫四子圖

客星遙犯洛陽宮帝座雲臺路已通君自一毛求駿  
馬我將雙眼送歸鴻青萍交映千秋色玉樹長含萬  
里風不是弟兄江海上誰堪綵筆與爭雄

九里松圖爲馬侍御作

二首

三天嘉樹儼成行下接枌榆卽故鄉遠勢不隨雙澗  
盡層陰並落二峯長葉棲金掌仙人露幹挺烏臺御  
史霜孔雀東飛煩再顧欲從威鳳託清光

其二

武林佳氣日蕭蕭夾道長松入望遙黛色總疑天目



雨寒聲不辨浙江潮含淒風自枯鱗起倒影雲隨偃  
蓋飄非值有心同竹箭懸蘿爭敢附高標

按察李公誕子公蜀人先以中書舍人爲御

史

高才染翰五雲中復道登車攬轡同雛有一毛殊是  
鳳駒無千里不爲驄名烏業已承家學字犬文堪命  
國工君自蜀人楊馬在同鄉奕葉播清風

贈李封君兼訊長君進士

五陵群少各賢豪客有能詩調獨高受業不隨秦博  
士爲文無害漢功曹十年我輩慚龍卧萬里君家起

鳳毛江左衣冠堪此地美名如昨照同袍

高光州孤山精舍

白雲不散一山孤地主人稱楚大夫老作西陵詩社  
長可携南部酒家胡囊餘太古雙龍劍壁有行春五  
馬圖汝賴過逢遺事在高陽似此聚星無

答龔茂才

中原相望兩漫漫傲吏重彈桂後冠不盡青雲東嶽  
起飛來白雪大江寒人今雨別千年事君自風流二  
仲看若問嚴陵灘上月小清河北照漁干

毛封君



公家安在薊門城出入漁陽結客行經學並驅韓太  
傅辭華脫穎趙先生丈人不作雄邊老令子還高秉  
憲名此日衣冠看甚偉也知黃綺負餘情

和吳太常南樓烟雨之作

南樓迢遞俯丹梯烟雨蕭條拂檻低越徼層陰千里  
合吳門春樹萬家迷江流欲動帆檣外山色纔分睥  
睨西一自不齋多暇日新詩誰與醉同題

送周給事還朝二首

才子先朝侍從年東山一卧主恩偏彈冠使借風  
雲起補袞新看日月懸疏動龍鱗成五色名聯騎省

映群賢當時諫獵還誰在聞道長楊賦已傳

其二

纔疑仙吏在人間萬里來風復漢關三殿不緣春色  
滿五雲爭識歲星還朝陽更王清華氣金馬依然供  
奉班未許陸沈如昔日須君持論答天顏

送勞少叅提學蜀中

分藩吳越氣雄哉人自南宮出上台一抱連城明月  
滿還看三峽使星來錦江波動詞場色劍閣高臨憲  
府開聖主賢臣今日事王褒門下本奇才

汪中承臺火救者獨以劍出彈鋏而歌和以



相弔

中丞臺火照閩方客有千金劍一裝賴是龍蛇先自  
起忽然風雨爲深藏迭形疑入延津水厭影猶含北  
斗光報國片心還獨在逾看鱗甲動冰霜

爲南海鍾侍御題金臺遙祝卷二首

游子承恩出禁闈高堂華髮照春暉潘輿自不隨  
馬萊綵何妨舞繡衣江鯉一從天上寄臺烏長繞日  
南飛即今婺女遙相望柱史星光近太微

其二

冰霜不厭北堂清冠指神羊海上城戀闕未須將好

疏倚門元自望君情家傳五字推承學朝擁三臺起  
令名驄馬更便千里駿還鄉實切斷機聲

送張閫使黔中

虎臣推轂滿長安吳越當朝閫外難君自雅歌稱坐  
鎮人疑漢將不登壇江湖常借軍聲壯海氣遙臨陣  
影寒滇水一珠堪照夜誰憐蕙苴竟同看

贈海憲蔡公開府

橫海今時領外臺書生謾說請纓來霜威瘴癘三山  
盡殺氣波濤萬里開攬轡本朝元楚望談兵當代一  
邊才 朝廷近有留中疏柱史星光切上台



送陸從事赴遼陽

御苑東風吹客過  
共看芳草有離珂  
函山晴雪鴻邊  
盡北海春雲馬上多  
地險時窺玄菟郡  
天驕夜遁白狼河  
知君幕下參高畫  
諸將何時議止戈

滄溟先生集卷之十一

滄溟先生集卷之十一

濟南李攀龍于鱗撰

七言律詩

送王侍御按貴陽

中原遙入楚天長  
道出盤江古夜郎  
自許鐵冠衝瘴癘  
兼携白筆掃風霜  
白蠻擁節開雄鎮  
萬里登車擊大荒  
莫說壯遊非妙選  
同時八彥避鸞行

郭吏部請急歸吳稱壽封君太宜人

水鏡清光滿薊門  
庭闈雙映一寒溫  
角巾入洛名元重  
裘褐依梁道並尊  
白首更偕吳市隱  
青雲再奉漢



宮恩還朝益妙題才術湖海微言可具論

武太常貞母太常是遺腹子

令子清標領太常持衡東省舊爲郎才因藻鏡知秋水胎本明珠產夜光天上旌旂懸日月人間竹帛映冰霜雖然燕趙多奇士已讓高風在北堂

戲擬王安人稱壽郭相國相國嘗爲盧江別駕

南山高唱入新題曲罷蛾眉玉盃齊秦史自偕嬴氏女廬江誰憶仲卿妻雙飛青鳥披雲下並蒂蟠桃帶雪携何必千金稱上壽嫣然一笑醉如泥

秋前夜過崑山安仲蔚時元美兄弟俱就徵車

有客中原回白頭懷人千里命扁舟吳門山色元非雨婁子江聲似是秋二友鴈行堪入洛惟君龍卧不依劉也知傾蓋須臾事一日檄書即舊游

上朱大司空

二首

重華冀北再開天益佐山林涉大川四岳受成方貢日三邊仰給縣官年黃金不及隄形壯白馬長隨練影懸轉自流言能悟主老臣知遇兩朝偏

其二



河隄使者大司空兼領中丞節制同轉餉千年軍國  
壯朝宗萬里 帝圖雄春流無恙桃花水秋色依然  
瓠子宮太史但裁溝洫志丈人何減漢臣風

送徐子與之武昌 二首

使君安在武昌城江漢雙懸憲府清共許登高能作  
賦不妨乘暇一論兵脩然白雪千人和颯爾雄風萬  
里生更憶南樓明月好欲携佳興與縱橫

其二

刺史樓臺望裏重是時門客羨登龍白雲三署還堪  
起黃鵠千秋更可逢象合星辰雙執法心隨江漢一

朝宗二天尊寵諸侯上出處何論邴曼容

和子與過訪平原道中值雪二首時按察楚  
中

九河風色報褰帷道入平原雨雪遲天欲並傳梁苑  
賦君今試和郢中詞憑陵尺素光猶動縹緲扁舟興  
可知况值如澗春酒熟好來投轄未須疑

其二

平原日映北風斜飛雪偏隨刺史車明月更投公子  
邑金門何處侍臣家綈袍忽自生春色彩翰紛然擁  
落花爲報袁安高卧起齊宮上客有田巴



皇太子冊立入賀

燕臺依舊鬱相望玉樹金莖是  
帝鄉鳳闕雙懸雲  
五色龍樓交映日重光九天氣王旌旗動三殿風清  
劍佩長伏謁不違顏只尺十年西省愧爲郎

江上贈郭第歐大任

元年飛雪度維揚此日秋風復故鄉總爲郭君紆綵  
纜况逢歐冶說干將回看京口孤城轉坐擁江流萬  
里長以爾相從諸子後新知得似丈人狂

吳使君自邵武之高州二首

先朝五子結交情一日青雲滿鳳城漢主憐才金作

署楚臣能賦玉爲名已應龍自延津起那更珠還合  
浦生直置壯游消不得纔兼遷客重縱橫

其二

中原五馬日駢駢嶺外翻傳俗吏稀逐客也須常作  
好使君安見遠游非庶無疾病堪乘興况有登臨可  
當歸漂泊秋風同一葉幾時還向洛城飛

早春元美自大名見枉齊河時元美代余浙中

如此春醪醉莫辭中原携手卽佳期何人命駕能千  
里與爾彈冠又一時嶽雪故應回足練江潮今復借  
褰帷比來慷慨悲歌地河朔風流更有誰



與子與游保叔塔同賦 山有落星石二拳

古塔松臺對寂寥高齋斜日傍漁樵金牛忽見湖中影鐵騎初回海上潮更倚連城明月動並携雙劍落星搖若非賦有凌雲氣筆底天花可自飄

和梁憲使過密咏天仙宮白松 是皇帝葬三女處

孤根一託葢珠宮不與茗華粉黛同夜暗龍鱗銜自照天清鶴影望來空條封姑射千秋雪蓋擁蘭臺萬里風非爲子雲能作賦誰知玉樹本青蔥

其二

軒轅宮裏試新妝縹緲連枝入帝鄉玉骨不緣能化

石冰肌那得便生香只愁明月銷爲水更恐清陰凝作霜巫峽瑤姬元素質却令雲雨污衣裳

其三

玉女窓前手自栽遙分海色向蓬萊唯應七聖襄城過曾見三花少室開地迴流光通粉署天寒老幹倚霜臺懸知的有千年露欲獻須君作賦才

答寄用晦王孫 二首

江上傳書錦字斜于時飛雪映瑤華誰攜雄劍非豐嶽但出名駒即漢家春色自憐彭澤柳美人相狎武陵花三年未報平安使長日心懸萬里槎



其二

豫章城上有高樓樓下長江二水流君更紅顏雄製  
作誰同清夜美遨遊陽春若許千人和明月何須萬  
里投不信祇今求自試詞場可但少應劉

答寄元美

飛書茗水報王孫杯底黃河似酒渾已讓五湖相代  
長敢臨中嶽自言尊人無西子堪同載客有如姬不  
負恩蕭索三餘回王氣風塵非復古夷門

寄懷蒲圻魏使君

三首

赤壁黃磯錦不如故人家傍武昌居蒲生太守裁鞭

後竹擁郎官賜管餘漕進興幾篇司馬賦銜冤一紙樂  
羊書楚材堪已推三晉那得長懸刺史車

其二

歸來高卧叔牙山恰爾分符出漢關一顧青雲生海  
上千秋白雪在人間非時按劍投珠起無意償城抱  
玉還所以離騷長苦怨楚臣容易老紅顏

其三

搖落誰憐作賦才高秋無處不悲哉大王自嘯雄風  
起神女長攜暮雨來非有上林春夢澤至今江漢遶  
蘭臺武昌月滿南樓夜安得青樽共我開



東陂同許殿卿陸道函灌甫兄弟賦

散髮東陂月滿庭王孫春草鴈池青平臺吹合風先  
起竹苑樽開酒旋醒自媿長卿工作賦誰憐子政老  
傳經明朝莫報高陽會不定江湖是客星

勸中尉園亭

分竹穿苔暑自平披襟小閣坐來清使君河上浮槎  
與公子夷門結轡情自有明珠堪照乘豈無佳色鮮  
傾城時人若問游梁客司馬相如字長卿

聞肖甫已代元美大名有寄

塞帷蜀道望吳天二子瓜期迴自憐五馬過逢曾此

地雙鳧飛去復何年誰言官合談兵起爾已名從作  
賦傳父老未須窺露冕何人不識使君賢

贈劉將軍

憶醉卿家春草芳征輶信宿向漁陽行間舊識千夫  
長轂下新推六郡良白馬從軍明月塞黃金結客少  
年場何時更出追驕虜策爾持纓請建章

送羅大叅之任山西 二首

鴈門句注九關通地接燕山 帝業雄使者汎舟從  
絳水將軍轉餉入雲中分藩忽壯 朝廷色開府深  
懸保障功晉國莫強兵馬地股肱何但數河東



其二

吏部風流入奏年諸郎誰不讓朝天五雲忽映檐帷  
動雙轄重臨水鏡懸色借綈袍堪病起詩更藻筆已  
名傳故人剩有河山在二子相逢海岱前

五言排律

送固始申明府還縣

百里絃歌邑春風獨在茲旋歸瞻日遠留借見天私  
復送仙鳧去言趨竹馬期渡河蠶月早行縣麥秋遲  
楚國先賢傳梁園上客詞知君才不忝遙以慰相思  
送李太守之東昌

諸侯辭北極千騎向東方一稱天府風煙接帝鄉  
地形來海岱漕輓自徐揚春弦歌邑花明太守章  
射書延上客照乘得高唐忘解刀劍人和下鳳凰  
軒帷塞雨雪郡閣卧星霜治行兼經術諸曹借寵光

送宋宇少府之蒲城

別離有楊柳折贈擬琅玕古道千人失時才一尉難  
清秋開少府紫氣指長安梅福稱仙仕蒲城得吏歡  
河聲公檄靜嶽色訟庭寒鴻鴈雲中出芙蓉月下看  
三秦至豪傑兩漢數衣冠馮翊今遺邑何輕佐幕官

答謝生盤山詩



愛爾躋攀處竒踪滿報章山盤元氣出寺抱翠微藏  
拂石搖天影披花帶雨香千峯回白首萬壑步清霜  
鼓角關榆墮旌旗塞草長陰風來大漠秋日下漁陽  
海色秦城外邊聲漢苑旁欲因臨望代遂得紀金湯  
送楊給事河南召募

醜虜休南牧朝廷議北征幄中新授律天下大徵兵  
使者持符出君推抗疏名黃金秋突兀白羽日縱橫  
嶽雪三花秀河水萬馬行將軍邀劇孟公子得侯嬴  
屠販多豪傑風塵鬱戰爭有呼皆左袒無役不先鳴  
寧久燕山戍終期瀚海清過梁投賦筆更爲請長纓

送林章之郎中讞獄南海

舊識干公傳新知陸賈才漢章雙鳳下越郡五羊開  
旌節看山駐樓船截海來長安天北望使者日南回  
訟府蒲堪掛刑書竹可裁明珠滿合浦應照不然灰  
送祠部莫郎中貴州提學

薊門一相送楊柳未堪攀亦是文章地寧虛供奉班  
西南天欲盡羌笮日多艱鼓棹過三楚傳經到百蠻  
春雲蒸赤水秋雨瘴青山早就中和頌諸生憶漢關  
題歐職方鵝山泉高齋

聞君讀書處乃在薊山阿水色開窓檻泉聲散薜蘿



濯纓秋雨至把釣夕陽多白壁澆田出寒流沒羽過  
風塵無燕息賓客有羊何一自從王事空爲勞者歌

集元美宅送汝思吳峻伯袁履善三比部

別賦吾能作還銷客子魂上林又黃鳥何處此青樽  
帝念徵兵日人銜祝網思星榆散使者春草待王孫  
于役分江徼相思共薊門風塵異南北莫向鴈書論  
賦得邊馬有歸心

飛將驅天廐乘秋踏大荒二軍呼驃騎一戰蹶名王  
急難才堪老橫行勢可當嘶聲悲漢月顧影淨胡霜  
沈鬱陰山上鳴鑣瀚海旁何如春草色躑躅向長楊

得殿卿書兼寄張簡秀才

久客疎歸計吾徒足醉眠風塵猶逆旅服食豈神仙  
老母須微祿郎官亦冗員時名非我意詩句衆人傳  
雞肋堪誰棄蛾眉幸自全羈情驚歲晚法署向秋懸  
竊笑吹竽濫深慙抱甕賢青雲浮世外白眼貴游前  
流俗終違性佯狂始入玄所甘才太拙敢望病相憐  
寄字存加飯興言問着鞭支離如昨日飛動異當年  
直覲亡胡虜殷憂切御筵逐臣收佩玦大將與兵權  
報主謀安出和戎議已偏乘輿空汗血錦繡被腥羶  
帷幄今何事京師未晏然乾坤多壘後仕宦畏途邊



海岱生瑤草朋從拾紫烟伊余方物役回首薊門天  
七夕集元美宅送茂秦

祖席陳瓜果征衣理薜蘿雲邊看露掌花裏出星河  
仙吏揮金椀佳人罷錦梭新知天上少秀句鄴中多  
踈拙時名棄歡娛虜騎過秋風吹鬢髮落日渡滹沱  
七首荆卿贈刀頭桂客歌明年見牛女能不憶羊何

碧雲寺

飛塔標龍藏長橋挂虎溪五王開壯麗二梵樹菩提  
淨土黃金布香臺碧漢齊經過初地變徙倚上方迷  
杖底籠清磬崖間散御題屢疑窮紺宇復道出丹梯

天樂蓬萊近祇林日月低水流僧舍下雲起佛堂西  
深愧雕蟲技難同怖鴿棲慈燈懸廣劫處處得摩尼

香山寺

往時占紫氣馬上看香鑪不是尋幽到其如發興孤  
迴標臨北極秀色攬西湖樹杪諸天出堦前衆壑趨  
花臺騫地起風鐸蔽簷呼月抱蟾蜍石星搖舍利珠  
玉毫侵瀑水金相湧浮屠妙偈傳從竺高僧至自胡  
法輪皆帝力下界復神都行幸當年事人王握大符  
經華嚴廢寺爲盧火所燒

醜虜殊猖獗諸僧坐播遷無方超寐滅有地入烽烟



境壞秋原上門空暮雨邊虛聞金作粟真見火生蓮  
星影疑纓綴雲光學蓋懸焚身香象泣照鉢燭龍然  
莫辨沉灰劫猶傳喫酒天至今餘淨土不復一燈傳  
人日同元美子與公實集子相宅得寒字

年華開此宴春色又長安得日人相勞披雲客共歡  
貼屏皆綵勝佐酒尚辛盤北鴈先花發西山過雪看  
文章投壁盡心事斷金寒不但蕭朱輩論交自古難

初春 四首

物色看如昨愁時獨不醒春陰含雨白日氣宿靈青  
國士紆三表王師壓二庭獻俘當祖社制勝本朝廷

使君行飛輓將軍議勒銘誰憐劉子駿心事有傳經

其二

橫海樓船下平胡羽檄飛五雲高王氣三殿敞春暉  
卜相敷文命徵兵出武威風塵終混合日月此瞻依  
薄宦無工拙浮名有是非陸沈吾豈敢疎懶世人違

其三

使者歸朝疏將軍捕虜才乾坤百越震烽燧九邊來  
國步艱難過天顏駘蕩開紫宮秦宓窈窕華省日徘徊  
白石飯牛客黃金圖駿臺終看成遇合未可怨無媒

其四



劉北看春色羈情坐鬱然官猶膠柱在名豈濫竽傳  
汨沒終何事文章自有權薄遊多難後知己衆人前  
疎拙容高枕風雲讓着鞭客朝安用解執戟至今憐

五日同子相遊天寧寺

四海攜名士彌天得上方綵絲還令節白馬自開皇  
揮拂靈花裏攤經祇樹傍燈輪侵日出塔影入雲藏  
淨土殊幽事清齋復妙香幻知看綬冕靜欲厭詞章  
薜荔來風雨杉松接渺茫人間空競渡未解問慈航

立春日示子與

舊游離別盡病客尚文園此地看春色唯君大雅存

揮毫當北斗握手向中原夙昔爲郎意平生知己恩  
紫氣臨燕塞青山擁薊門豫愁分袂日花裏倒芳樽

燕京篇

燕京豪俠地杯酒爲君陳雙闕西山下諸陵北海濱  
薊門行雨雪黍谷變陽春騶衍初臨碣荆軻故入秦  
黃金來駿馬白壁售佳人定鼎還先帝千年正紫  
宸

哭陶侍御

伏柱稱仙吏彈冠即諍臣逢時隨八彥攬轡屬東巡  
抗疏惟安漢危言屢借秦寵光回造化正色上星辰



夢已摧高翼，災非批逆鱗。孤臺遙向夜，五柳黯傷春。  
白鶴還來客，青驄豈避人。朝廷存折檻，道路指埋輪。  
擊隼才何健，神羊氣不馴。分陰空自惜，浮世轉難陳。  
風裁登車罷，霜華掛劍新。群鳥哀就老，列栢采爲薪。  
鬱鬱匡君意，飄飄出使身。廬山彭澤外，落日九江濱。

哭公實六首

逝矣梁公實，清時隱漢關。扁舟浮大海，健筆誌名山。  
豈悟風流盡，猶言洗沐還。文章憎白髮，服食誤紅顏。  
禪草來天上，玄經出世間。縱爲華表鶴，羽翮已難攀。

其二

客有燕山至，傳君喪海隅。含香情不厭，辟穀事還迂。  
詞翰家長技，經綸國大儒。天心曾爾輩，雪涕自吾徒。  
精氣乘朱鳥，浮生過白駒。所悲無舊物，此道失前驅。

其三

寶沈其爾崇，單闕乃爲災。偃蹇非關病，文章未盡才。  
他人紛項領，之子渺塵埃。白日中原墮，高秋大海迴。  
自逢雙鶴至，誰叱五羊來。欲掛延陵劍，風雷不可開。

其四

一虛郎署問，竟負帝鄉期。此日名堪定，千秋事可知。  
賦寧爲異物，人已不同時。垂白君應妬，還丹我自疑。



橐裝高卧盡推結舊遊悲坐識藏舟理行令荷鋪隨  
其五

從此微言絕何當大夢醒人間矜意氣地下闔精靈  
虛室還生白遺編竟殺青浮名流景過夫子望秋零  
同舍悲離索投詩哭杳冥山陽風雨夜隣笛未堪聽

其六

嶺南秋慘淡海上日蕭森不王衣冠氣云亡雅頌音  
操斤臣質少題柱主恩深此物何陵替斯人乃陸  
沈衆方疲道路爾欲久山林所以生芻蕘終難託素  
心

郡齋同元美賦得高字

風塵如昨日千里得同袍秋色隨佳句浮名避濁醪  
故人滄海遠使者白雲高小郡常懸榻君家自佩刀  
飛揚鞭弭約慘淡簿書勞別後看多士元龍未似豪

宿華頂王井樓二首

玉井通溟海朱樓冠削成波傳湖汐到檻接斗牛平  
虎魄侵燈出蓮花傍枕生拂盆雲髮暗映掌月珠明  
犯座人間象浮槎世上情不愁更漏絕石鼓自能鳴

其二

不寐芙蓉冷幽棲薜荔驚靈胡秋貝顯鬚毛女夜妖精



暗穴龍蛇走深林虎豹耕星連碁石布雨共洗盆傾  
霜絕千尋鎖風邀五舌笙豈因臨帝座呼吸變陰晴  
冬日王給事出示許中丞苦熱詩卷

最秀中丞句尤奇苦熱篇開函迴白雪展卷失寒天  
硯石猶堪礫壺冰豈自堅蠹魚冬不蟄螢火夜應然  
才是洪鑪縱名將汗簡傳歌來探綵扇寫罷撤青氈  
藻筆還生色雲箋更雜烟五言如挾纊一字解纏綿  
病暍南風後魂銷大雅前霜臺三十載就日寸心懸  
和殿卿咏梅篇

忽報探梅句深知冰部賢空梁流漢月寒色動江天

影落青梅裏花生綵筆前新妝縈素練白雪洒繁絃  
南國書堪寄春風病獨憐更慚清思減不及兔園篇  
爲魏使君送黃生歸楚

太守高齋客時名豈易同六朝相上下五馬共西東  
非土悲王粲通家賴孔融登臨存勝蹟坐嘯挹清風  
四塞黃河險三峯日觀雄楚才元自老郢曲本難工  
裂素題班篋裁繻謁漢宮歸堪吞夢澤卧合起隆中  
雨雪綿袍暗江湖劍氣空武昌魚正美彈鋏意何窮  
送魏樸如孝廉省試時使君上計與偕

朝宗方岳入問寢孝廉行經術俱高第傳家接大名



雲霄雄北上事業壯南征奕世和戎策江湖戀闕情  
一毛隨鳳集合浦讓珠明物色燕常滿人才楚至精  
千金圖五馬片玉抵連城績奏龔繩直辭含樂鏡清  
賜車郎署羨奪錦士林榮計吏分憂下文場得雋鳴  
召翁今乃父丙相昔同聲會使臨軒日風流動漢京  
再上少宰誦德述懷

弱冠登高第詞林擁重名兩朝廷侍從空冀走諸生  
身自宮僚備親看國史行稍遷猶八座加授即孤卿  
不盡兼曹美長餘列署清文章闕王氣儒術定家聲  
羽翼衝天就波瀾赴海成見知同筆研記憶控銓衡

鷄肋才華薄羊裘物色輕人應疑畫餅君但入調羹  
北斗如相照南山亦至情少微雖冗宿同向掖垣明

天官殷少宰程淑人輓歌

弱歲徵箕帚童年託舅姑餘光東壁駐慈色北堂敷  
裘褐雲霄度蘋蘩日月徂國香堪是夢閨秀豈爲芻  
零露晞金掌清冰涸玉壺珠沈知旁斗絃斷憶將雛  
鳳逝泥書暗鸞銷水鏡孤繪帷含藻落彤管帶花枯  
作楫君能事藏舟妾敢誣網蟲遺挂在羅雀外家無  
雜佩傳淒響殘機激壯圖乳糜疑自愛琴瑟訝相扶  
兩鵠云當復三魚兆已符客悲來白鶴帝寵會青烏



河漢深難越天門近可呼精靈成婺彩千古照皇都  
重送張闔使

將才君自有儒術衆誰如廷對諸生策家傳孺子書  
百蠻麾下出兩浙閩中居故事單醪在流言二卵虛  
名應銅柱上身是玉關餘拊髀方今日君恩未可  
疏

夏日張茂才見枉林園二首

殘書開積雨高枕對重林非爾乘幽興無人惠好音  
分寧鷄黍薄交自布衣深不改青松色堪知白雪心  
諸生貧嗜酒多病老抽簪何必論丘壑金門總陸沈

其二

當時河朔飲未必勝陶家古井層陰合虛亭落景斜  
敲碁來凍雨散帙映明霞樹轉雙文鳥盤浮五色瓜  
清談開暑氣白髮瑩冰華更有忘憂草能回隱士車  
答潘仲子和贈張茂才見枉林園之作

似解滄洲趣因傳白雪聲時才方上下秋興獨縱橫  
車馬分交態林園斷世情名寧花萼重句自薜蘿清  
弱冠推高第雄飛失後生二毛知老筆三抱見連城  
業已深移疾閒仍事耦耕有君堪倒屣一爲款柴荆  
夏日襲生過白泉精舍索贈



本自巖扉客承家事耦耕中年歸卒業壯歲託論兵  
身覺儒流貴心疑俠氣輕垂成看一第良久遜諸生  
狗曲群爲詬毛詩獨著名貧終諳世味老益見交情  
伏臘書相勞寒溫酒數行白泉鍾乳色黃鳥竊脂聲  
彩電投壺出疎星對局明即知河朔會夙昔已縱橫

答報顧中翰

政本趨陪地身隨宰相行兩房深侍從三殿雅知名  
染翰宮雲濕兼銜掌露清與聞鍾五字同病沈雙聲  
何意乘槎客能憐伏枕生投詩迴俗態把酒說人情  
敢謂龍門峻難霑鳳沼榮華陽今夜月醉眼爲君明

初抵浙中感遇一首呈馬丈

冀北登車日淮陽卧閣年  
檐帷非不撒舞袖竟難旋  
一顧堪千里群疑託二天  
門生高自出屬吏拙相憐  
紫氣臨關動文星傍斗懸  
樵漁歸計穩犬馬受知偏  
物色中原起封章上國傳  
江湖餘壯觀風俗美多賢  
下榻時名盡分庭客禮全  
隋珠如片月長在報恩前

贈陸膳部

清覽三臺上名家四姓前  
累朝霖雨望群從聚星賢  
北斗尚書府南宮視草年  
秩宗周典禮膳部漢常員  
官屬青雲氏才高白雪篇  
微言黃絹在美節素絲傳



筆綵生春暑蘭薰握近天明光寧再入空此羨神仙  
貞石篇爲吳比部賦

砥柱高王室盤宗壯帝京支機河漢迥浮磬泗濱清  
孺子兵書號郎官水鏡名一鞭皆至海三獻即連城  
絕學驅羊起群疑伏虎生梧臺深自饗司寇雅稱平  
磊落披雲氣馮陵轉壑聲雄藩隆岳佐華省映星精  
文陛含香入巖廊草奏行綵毫常五色何限補天情

與子與游靈隱寺吳馬諸公同賦

片雨挂龍吟清風嘯虎林海浮西域至江插洞天深  
小嶺將遙集名山豈陸沈地靈聞水樂岫隱見雲心

金粟寒應結香爐迴自陰藤蘿褰窈窕臺殿倚蕭森  
石笋高搖筆蓮花淨盞簪何須懷謝客俱解越中吟



滄洲先生集卷之十二

濟南李攀龍于鱗撰

七言排律

郡齋同元美賦得明字

落日千山短髮明  
蕭條轉見故人情  
時危小郡徵求少  
秋到高齋卧理清  
豈謂文章妨遇合  
深知偃蹇負平生  
論心對我杯中物  
握手看他世上名  
遂使浮雲愁大陸  
何來二子在孤城  
風塵如此仍爲守  
愧爾新詩滿帝京

送歷城李明府入計



五陵佳氣薊門東此地車書四海同葉令遠爲朝會  
使漢家新起建章宮君王受計當天月朔垂衣出  
禁中臺史莫疑鳧屢至都人已識馬能工三齊郡國  
惟高第百里絃歌播大風清問即求封禪草好因文  
似薦揚雄

題徐子與門生汪惟一竹丘圖

靈丘隱者一逃名萬竹臨江見底清徙倚七賢相寄  
傲便娟二女重含情葛陂詎信雙龍影嶰谷空傳五  
鳳聲風雨長教秋色駐冰霜兼與歲寒盟投干渭水  
不堪老受簡梁園賦已行願得此君開蔣徑不妨佳

客醉宜城浮雲西北來何莫今日口東南美自并截作  
武陵溪上笛方知馬援有門生

留子與署中

杭城落月早潮生憲府松杉風亂鳴伏枕待三從劾  
免移文滿百不留行何人更許彈冠會唯爾還堪倒  
屣迎十載寒溫無長物一時出處有餘情酒斟白玉  
吳姬色賦擲黃金楚客聲大抵冥鴻心自遠魯來老  
驥氣難平浮雲在昔懸素望北斗依然捧漢京吏挾  
江湖纔是傲交論冰雪未爲清官聯西省聞題柱家  
本同鄉見請纓誰似兩朝銜寵遇它如群少失縱橫



樽前且抗持螯手世上空傳染翰名須聽松杉風再起晚潮乘月到杭城

與劉憲使過子與大佛寺

西湖斜日淨風烟北嶺岩巉出半天磴道乍從空外轉樓臺已入鏡中懸塔分西域銅餅勢石紀秦宮錦纜年白社但須彭澤酒青山不用華家錢波搖玉樹堪雙映月上珠林好獨眠我輩自狂君莫訝平生未敢謬周旋

五言絕句

寄殿卿

一作山中客蓬蒿自滿廬舊遊誰獨往新著復何書

別意

朝來送歸客復此長河湄立馬折楊柳已無前日枝

山中

君去何時歸山中春草夕莫將白雲廬不及紅塵陌

贈元美

共擬懷人作先成幼婦篇微音知者少佳句法誰傳

寄登宗秀才茂登池亭二首

笑此杯中物從他世上名黃金結客盡誰識濟南生

其二



窓中采蓮舟落日菱歌起坐見浣沙人紅顏照秋水  
渡易水贈伯承

七首腰間鳴蕭蕭北風起平生壯士心可以照寒水  
郡齋同元美賦得傍字

三載邢州客看人道路傍風塵君自見誰愛接輿狂  
酬郭子坤感懷四首

懷璧如明月連城未肯開君王終見賞且爲守蘭臺  
其二

若問浮生事風塵病裏過開樽看漸少伏枕似還多  
其三

何來鶴鬢雪五月鏡中寒便欲煩君鑷蕭蕭不可看

其四

不須婚嫁畢始作尚平遊五嶽年年在浮雲處處愁

戲呈子坤三首

聞君携愛妾辛苦事求仙自繡浮丘鶴長齋子晉前  
其二

家有秦臺女青雲路不遙但愁明月夜天上喚吹簫  
其三

丹竈幾時開妝成倚鏡臺不須嗔竊藥本自月中來  
病中贈殿卿二首



年來殊不病那得似維摩玄度談名理支公柰爾何

其二

玉兔操金杵誰知擣藥年豈應天上住不有病神仙

冬日四首

憔悴江湖上行吟雨雪寒不逢漁父問誰作楚臣看

其二

日澹平陵城寒高華不注北風湖上來雪片大如鷺

其三

客來堪自見酒盡且須酤不是南山色貧家一事無

其四

風雪不出門苦吟何時已沽酒城中還先生擁褐起

立春二首

綵花可憐色為報漢宮春今日文園客依然四壁貧

其二

駘蕩還春色蕭條亦世情不然三徑裏豈愛蔣元卿

漫成二首

有酒但須飲無世不可避方其潦倒時何與傍人事

其二

翟公既罷官人棄理亦賤殷勤莫署門交情不必見

桃花嶺



一度桃花嶺煙霞處處新  
縱迷源上路猶似武陵人  
丁香灣

平潭澹不流寒影群峯集  
斜陽一以照彩翠忽堪拾  
春日自戲

自從移疾後誰謂主恩疎  
每及山林士天顏滿薦書  
殿卿示樂府序小詩報

知音千載事君適賞心同  
從此三都賦人傳左太冲  
羽林郎

從軍少年場富貴歸故鄉  
一拜羽林騎鞍馬自生光  
羅敷曲

春日照城隅羅敷陌上趨  
自能停五馬不是使君愚

山房書壁

二首

夏日山房清田作稍就次  
銜杯自有真高枕元吾事  
其二

隣翁幸相勞斗酒不須滿  
且持伏雌還視君牀下卵  
歲杪再得殿卿書却寄

連札鴈池來春風錦字開  
似看嵩少雪把酒上平臺  
答寄襲懋卿

白首知經術青袍見  
主恩爲尋楊子宅不到五侯  
門



和題郭山人五嶽游囊雜錄六首

五嶽圖

遠遊何所佩五嶽真形圖怪爾煙霞裏精光互有無  
杖

十載相携處白雲知幾重莫經葛陂道風雨去為龍  
納

夜投東林寺北風雪大作捫蝨對山僧衲衣不堪着  
瓢

山中無供養時復飯胡麻不是桃源水何人漱落花  
鋤

百草各爭芳蘭生詎能那竭來深谷中我鋤還自荷  
觚

醉來市上眠我觚不離手本自高陽徒逢人時乞酒  
和子與留別二首

別酒故人同留詩古寺中唯應湖上竹一為起清風  
其二

結客五陵東相邀入漢宮但攜龍劍往不必問雌雄  
七言絕句

寄龔昂

白雲湖上白雲飛長白山中去不歸君在幾峰秋色



遍何人共結薜蘿衣

惆悵詞

休將翡翠縮金針不折芙蓉綴玉簪誰見雲中雙比翼空傳月下兩同心

送殿卿

莫辭杯酒薊門春匹馬明朝客路新陌上少年君自見相逢誰是眼中人

送劉戶部督餉湖廣五首

洲邊處士題鸚鵡陂上公孫擁驪驪到日夏屋正七澤愁時秋色滿三湘

其二

馬上春風白接羅花開應醉習家池鹿門耆舊何人在今日襄陽異昔時

其三

漢江春水竟陵東江樹蒼蒼繞沛宮父老只今猶望幸君王按劍顧雲中

其四

洞庭仙使日相乘君自扁舟似李膺江雨茫茫江草徧不知何處是巴陵

其五



錦帆南入楚雲重江上遙看衡嶽峯落日蒼茫秋不  
斷青天七十二芙蓉

與元美集李郎中賦示謝生

仙郎歌動白雲秋酒滿金樽月滿樓借問西園飛蓋  
客座中誰不似應劉

送吳郎中讞獄江西 三首

春風躍馬出長安送別江南路渺漫共說豐城龍劍  
氣到時還向獄中看

其二

廬山北望楚天分君去揚帆入綵雲草色秋迷彭蠡

澤不知何處弔番君

其三

三十三峯滄水陰中藏玉笥白雲深自從歸去神仙  
尉秋草茫茫不可尋

席上鼓飲歌送元美 五首

翩翩白馬度秋風共醉胡姬酒肆中舞劍吹笳歌出  
塞送君朝發薊門東

其二

落日銜杯薊北秋片心堪贈有吳鉤青山明月長相  
憶白草寒雲迥自愁



其三  
風色蕭蕭易水寒  
荆卿七首入長安  
憐君更向江南去  
此地何人意氣看

其四

青楓搖落氣悲哉  
客有將歸張翰才  
東望三吳秋色裏  
掛天帆影大江來

其五

碧天無盡白雲孤  
到日扁舟落五湖  
不見蒹門秋草色  
愁心明月滿姑蘇  
雪後憶元美

雪後千門月色開  
故人遙憶子猷回  
饒他已盡山陰興  
半夜還須載酒來

送子相歸廣陵  
七首

茂陵消渴卧詞臣  
搖落秋風白髮新  
漢主豈無金掌露  
馬卿元是倦遊人

其二

相逢杯酒蒹門關  
腰下并刀明月環  
開匣贈君當落日  
能令秋色滿燕山

其三

少年裘馬結交場  
壯歲功名竹帛光  
海內黃金看有意



氣人間白雪見文章

其四

薊北青山照別卮請君聽我秋風辭揚州十月梅花  
發江上春光好贈誰

其五

白雲無盡楚天寒鴻鴈蕭蕭楓樹丹楊子月明愁裏  
度蕪城雨色夢中看

其六

廣陵秋色雨中開繫馬青楓江上臺落日千帆低不  
度驚濤一片雪山來

其七

廣陵城上秋瀟瀟濤聲欲來風色驕聞道天三百  
里不知何似浙江潮

再別子與四首

徐卿寵送酒如河半醉當筵楚調歌握手燕山春草  
色緘書西省白雲多

其二

馬上垂楊縮別愁樽前斜日爲相留明朝何處風塵  
吏回首青雲是舊遊

其三



薊門山色雨中開  
三月漁陽春水來  
愁殺故人看錦  
字白雲秋樹滿  
燕臺

其四

知君起草建章宮  
每見徵書問畫熊  
在昔漢臣多領  
郡黃金先賜右扶風

留別吳舍人 三首

舍人書札五雲開  
應笑風塵減吏才  
池上鳳凰今不  
見何因得下郡城來

其二

檐帷明日罷朝天  
擬向風塵坐避少年君  
自楚人諳故

事于今白雪有誰傳

其三

薊門春色送歸愁  
楚客思家屬倦遊  
借問何人賦搖  
落白雲依舊洞庭秋

塞上曲四首送元美

燕山寒影落高秋  
北折榆關大海流  
馬上白雲隨漢  
使不知何處不堪愁

其二

漢兵圍合左賢王  
吹角千山夜有霜  
君試狐奴城上  
聽豈堪秋色滿漁陽



西出居庸大漠開胡塵遙暗白登臺愁看塞上蕭條  
色落日秋風萬里來

其三

白羽如霜出塞寒胡烽不斷接長安城頭一片西山  
月多少征人馬上看

留別子與子相明卿元美 四首

青雲如舊滿燕關病客風塵且自還到日 齋春酒  
熱城頭何限太行山

其二

使君千騎自東方回首春雲五鳳凰此日 主恩曾  
不淺還容長孺卧淮陽

其三

總為風塵去住難黃金臺上醉相看倏然落日離歌  
起忽爾燕山白雪寒

其四

莫道休官意不真三年為郡苦風塵青雲縱有憐才  
客白眼終非解事人

於郡城送明卿之江西 四首

江上青山滿謫居還家莫戀武昌魚 君王日下求



賢詔憶爾還開諫獵書

其二

青楓颯颯雨淒淒秋色遙看入楚迷誰向孤舟憐逐客白雲相送大江西

其三

長安二月縮垂楊為爾踟躕五驢驕今日故人投轄地况逢山色滿邢襄

其四

高齋秋色滿西山梅福當年此抱關君到豫章勞問訊漢家遷客幾人還

郡齋同元美賦得橋字

山色秋停使者輶孤城何處不蕭條請看襄子宮前水依舊東流豫讓橋

懷元美

瑯琊山上越王臺秋色高臨海色開莫向中原看落日浮雲萬里為君來

懷明卿

豫章西望彩雲間九派長江九疊山高卧不須窺石鏡秋風憔悴侍臣顏

懷子相



越王城上黯銷魂，萬里秋風動薊門。  
君自平生稱國士，南遷豈負信陵恩。

懷子與

青山忽送七閩秋，大海遙連百粵流。  
落日孤城風雨合，寒帷何處不堪愁。

寄伯承

才子含香滿玉墀，仙郎賦就幾人知。  
只今西省空相憶，揚馬風流自一時。

寄茂秦

誰惜虞卿老去貧，平原食客一時新。  
懷中白璧知何用，

月何處還投按劍人。

寄順甫

江漢秋風萬里生，浮雲不見鄂王城。  
于今楚調無人憶，爾還高白雪情。

寄余德甫

使者銜恩入楚天，秋風吹動豫章船。  
孤帆遙掛浮雲色，西望長江落日邊。

答殿卿

扁舟歸去五湖春，愁見紅顏掌上新。  
明月自閑歌舞地，秋風憔悴捧心人。



答元美

蕭條鸚鵡賦初成，偃蹇當年一禰生。  
屈指中原餘子盡，非君誰見孔融名。

汝思見過林亭二首

五柳陰陰逼酒清，一杯須見故人情。  
明朝馬上聽黃鳥，不似樽前喚友聲。

其二

自買南山種秫田，幾回留客甕頭眠。  
與君今日拚沈醉，莫笑陶家乏酒錢。

五日與殿卿遊北渚二首

青樓畫舫暗湖濱，風俗遙傳楚逐臣。  
潦倒只今君自見，那能長作獨醒人。

其二

五月五日榴花杯，故園故人北渚來。  
君今不飲紅顏去，那有長絲繫得回。

酬殿卿長史夏日過飲四首

蕭蕭風雨北堂寒，客似高陽復罷官。  
君但能來長夜飲，不妨人作酒徒看。

其二

故人深愧子雲才，風雨茅廬晝不開。  
寂寞已甘車馬



絕君今載酒爲誰來

其三

白雲湖上華陽山那得相看不醉還明日蓬蒿三徑  
沒誰憐長史在人間

其四

美酒新開琥珀光還堪潦倒故人傍已拚十日平原  
飲怪爾能飛五月霜

九日同殿卿登南山 四首

滿天鴻鴈雨紛紛濁酒黃花把向君莫道龍山高會  
後風流今少孟參軍

其二

茱萸美酒玉壺殷此日逢君一醉還愁見孤城秋色  
裏不知風雨遍空山

其三

處處登高白髮新年年陶令罷官貧蕭條豈少東籬  
菊不見當時送酒人

其四

黃花蕭瑟雨中寒搖落東林木葉丹不是故人能載  
酒祇今秋色好誰看

秋日東村偶題 二首



西風蕭瑟病相如高枕從他世上疎莫道浮雲多變態還將秋色到茅廬

其二

五柳青青醉裏春那能長作折腰人情知縱酒非生事昨日罷官今日貧

九月八日東村送无美

濁酒枯魚自不貧黃花况復席邊新明朝縱及龍山會那得長逢落帽人

和答殿卿冬日招飲田間二首

白眼風塵一酒卮吾徒猶足傲當時城中年少空相

慕說着高陽總不知

其二

白雲湖上北風寒茅屋蕭條兩鷓冠我自能憐華不注推窓君試雪中看

寄慰元美二首

幕府千山薊北青朗陵賓客夜充庭卽今無恙荀文若着膝猶堪當一星

其二

少婦紅妝玉筯寒清秋銀燭對闌干無情最是它鄉月不就仙郎掌上看



春日聞明卿之京為寄

十載浮雲傍逐臣歸來不改漢宮春  
摩挲金馬宮門外誰識當時諫獵人

寄懷元美

塞北江南萬里長各天兄弟正相望  
誰將匹練吳門色哭作燕山五月霜

仲鳴蒲桃

萬顆蒲桃照玉盤西施乳滴露華寒  
故人更比相如渴不向金莖夜夜看

王中丞破胡遼陽凱歌四章

匈奴十萬寇遼陽漢將飛來入戰場  
直取單于歸闕下論功那更數名王

其二

萬里橫行大破胡沙場西北漢軍孤  
不因驃騎能深入知有陰山瀚海無

其三

再領樓船護海濱三持節鉞掃胡塵  
怪來長得君王寵自是麒麟閣上人

其四

中丞萬馬下榆關拂海旌旗破虜還  
幕府秋陰連殺



氣散爲風雨暗燕山

爲劉伯東題王母圖壽太夫人

翩翩五鳳五雲開客自金門侍從才六月海東桃又  
熟親隨阿母漢宮來

勞別子與二首

武林山對海門開不枉登臨酒一杯十載故人零落  
盡有誰還爲度江來

其二

馬卿元自漢詞宗

天子同時歎不逢總爲故人邀

貴客故將車馬過臨邛

張明府見惠榴柿二首

牀頭酒百花香醉裏誰知柿子黃想道故人消渴  
久秋來爲摘滿林霜

其二

誰遣明珠掌上來秋風吹籠石榴開若非金谷園中  
樹定是河陽縣裏栽

答右史問山中與誰把苦

依然濁酒竹林傍那道窮途便不狂白眼生平君自  
見可能容易入山陽

見火齊鐙問是右史持入梁



火齊春鐙七采裝誰投明月向梁王也知照乘珠猶  
在不是先容不敢張

山中簡許郭二首

山中酒熟住山中早晚羊何請謝公莫道白雲終日  
在及看秋色向丹楓

其二

金牛谷裏樹蒼蒼一入千峯但夕陽浪跡莫愁難問  
訊題詩多在朗公房

滄溟先生集卷之十二



